

## 68: الولادة د سيدنا يسوع المسيح

إنجيل لوقا 1 و متى 1

كانت واحد المرأة مسمية "مريم" كتسكن في واحد المنطقة مسمية "الجليل"، مريم هدي كانت مخطوبة نواحد الراجل مسمي "يوسف".

في واحد النهار جى عندها واحد الملاك وقال لها: "أنتينَ مرأة مباركة من بين جميع النساء، والله معاك، ما تخاف شي، حيث الله أخترك، وها أنتينَ عتجل وتولد واحد الولد وتسميه "يسوع"، الّهي هو أبن الله، وعيعطيه الكرسي د داوود، وعيحكم على الدوام".

تفاجأت مريم وقالت نالملاك: " كيفاش عيوقع هَد الشّي وأنا باقى بنت وعمّري ما حداني شي راجل". جاوبها الملاك وقال: " الروح القدس هو الّهي عيسكن فيك، والله قادر يعمل هَد الشّي، على ديك الشّي عيتسمي ابن الله".

و في واحد الليلة ملّي كانت واحد الجماعة د السّراح كيرعاو الغنم ديالهم، قرابين من مدينة بيت لحم. ظهر لهم واحد الضوّ قوي و ما قدروشي يعرفو شنو كان ديك الشّي. شويّة وهو يجي عندهم واحد الملاك د الله وقال ليهم بلّي في بيت لحم خلق "سيدنا المسيح" الّهي عينجّي الناس من العقوبة د دنوب ديالهم.

إيوا، السَّرَّاح مشاو دغياً نمدينة د بيت لحم وتماً جبرو  
مريم، مامّاه، ويوسف راجلها و يسوع و سجدو له. و من  
بعد، مشاو السَّرَّاح و قالوها نالناس ديك المدينة كاملين.  
ومور ديك الشّي جاو حتّى شي عولامة د الفلك من  
الشرق نأورشليم، كيصاقصيو عليه وكيقولو: " فاين هو  
الملك د ليهود ؟ حيت حنا شوفنا واحد النجمة، في الشرق  
وجينا باش نسجدله". حيت هم كانو عارفين بلّي في  
الوقت الّي عيشوفو فيه ديك النجمة عيخلق الملك د ليهود  
الّي هو يسوع، علاحقاش كانو تنبؤو بهد الشّي شي أنبياء  
من قبل. وملي عرفو ديك العلماء د الفلك بلّي الملك  
هيرودس بغى يقتل يسوع، ما قالو له شي فاين هو،  
ومشاو في حالهم.

وحتى العولامة د الفلك ملي شافو يسوع مع مامّاه  
سجدوله، وعطّاله بزّاف د كادوس، لا من ذهب ولا من  
نّد و المرّ.

- النبؤات كاملة وديك الشّي الّي قالوه الأنبياء في  
العهد القديم، كمّله الله في المجّي د يسوع المسيح  
باش ينجّي الناس الّي أمنو بيه من الموت.
- باش نعملو الإرادة د الله خصّنا نطيعوه ونتيقو فيه،  
وهو أكيد عيباركنا.
- إذا طلب منّا الله شي حاجة، خصّنا نكونو واجدين  
باش نعملوها.

## 69: الهدف من الولادة د يوحنا المعمدان

إنجيل لوقا 1

كان قال من شحال هدي النبي إشعيا بلي عيجي واحد  
آلي عيوّجّد الطريق نيسوع المسيح، وعيبشّر بالتوبة على  
الخطية، وعيطلب من الناس باش يمشيو في الطريق د  
الله.

في ديك الوقت كان واحد الفقيه مسمّي "زكريّا" ومرأته  
مسمية "أليصابات"، متّقين الله وتابعين الطريق ديالّه.  
ولكن خسارة، كانو كبارين في العمر وباقي ما عندهم  
شي لولاد، حيث المرأة كانت عاكرة. وفي واحد النهار  
كانت القرعة في زكريّا باش يبخر الهيكل د الله وهو  
يظهره واحد الملاك، مّلي شافه زكريّا خاف بزاف.  
ديك الساعة الملاك هدر معاه وقال له: "ما تخاف شي يا  
زكريّا، حيث الله أستاجب نالصلوات ديالك، وعيرزق  
مراتك بواحد الولد، آلي عتسمّيه يوحنا"، وعيفرحو  
بالخلق ديالّه بزّاف د الناس وعيكون ماشي في الطريق  
د الله". زكريّا شكّ وقال: "كيفاش عنعرف بلي هدّ الشّي  
عيوقع حيث أنا ومراتي كبارين؟" جاوبه الملاك قال له:  
"أنا جبرائيل آلي كنهدر معك، وجيت باش نبشرك وباش  
نبيّن لك بلي كلامي هو الحقّ، من دابا نفوق ماعتقدر شي  
تهدر حتّى يتحقّق هدّ الشّي آلي قلت لك"

دازت الأيام وديك الشّي آلي كان، أليصابات حملت،  
وبدات كتقول: "شاف فيّ الله وحيدي العار ديالي قدام  
الناس".

دازت للأيام و ولدات أليصابات. و في النهار التامن جاو  
الناس باش يطهرو الولد كيفما العادة، وسمّواه على الإسم  
د باباه زكرياء، ولكن ماماه قالت لا نسمّيواه يوحنا. وملي  
سولو زكرياء كتب لهم في الورقة "يوحنا" كيفما قالت  
أليصابات حيت ما كان شي كيقدر يهدر كيفما كان قال له  
الملاك. وديك الساعة بدى كيهدر زكريا عاود تاني،  
والناس بقاو غير مشلوطين، وقالو في قلبهم: "مانعرف  
شكون عيكون هد الولد؟" وكانت اليد د الله ديماً مع  
يوحنا.

ملي كبر يوحنا وبدى الخدمة دياله، كيفما كان قال الله  
نزكريا، بدى كيبشر بالإسم د الله وكيقول نالناس: "توبو  
ورجعو نالطريق د الله. وكيزيد يقول لهم آلي عيجي من  
مورايا أحسن مني وما نستاهل شي حتى نفصخ الخيوط د  
الصبّاط دياله. أنا كنعمد بالماء، أمّا هو عيعدكم بالروح  
القدس".

وهو كيهدر مع الناس، جى نعهده يسوع المسيح وطلب  
منه باش يعمده حتى هو، وديك الشّي آلي أعمل، عمد  
يوحنا يسوع كيفما طلب منه. و ملي غطّسه وخرجه من  
الماء، نزل على يسوع المسيح الروح القدس في الصورة

د الحمامة ووقفت على كتافه. وتسمع صوت من السماء  
كيقول: " أنتين أبنين، وأنا فرحان بيك".

يوحنا كان واحد الراجل معقول، وما كينافق شي الناس.  
ديك الشّي الّي خلّي شي واحدين يكونو ضدّه، خصوصاً  
الملك "هيرودوس" الّي دخلّه نالحبس و أمر باش يقطعو  
له رأسه.

- الله أمين وصادق على ديك الشّي، خصنا نتيقو فيه،  
حيث إذا واعد كيوفي بالوعد ديالّه.

- حتى حاجة ما مستحيلة على الله، هو قادر باش يعمل  
كل الشّي.

- إذا أعملنا شي حاجة مزيانة، ما نتكبرو شي  
ونفتاخرو بها، لا، نعطيو المجد نالله، حيث هو الّي  
كيعمل كل الشّي، وحننا غير كيستعملنا باش يحقق  
الإرادة ديالّه .

- ملّي نهذرو مع الناس، نقولو الحق، وما نخافو شي  
ونردو البال عندك نعملو الفرز بيناتهم.

## 70: الخطبة ديسوع فوق الجبل

متى 5-6

في واحد المرّة مَلّي شاف يسوع المسيح شي جماعات د الناس طالعين نالجبل جاو عنده التلاميذ دياله وبدى كي علمهم وكي قول: سمعتو بلي كي قولو تبغي الّي كي جيك وتكره العدو ديالك، ولكن أنا كنقول ليكم بغيو العديان ديالكم، ودعيو مع هادوك الّي كيتعداو عليكم. باش تكونو فحال باباكم الّي في السماء حيت هو كيشرق الشمس دياله على الّي مزيان والّي قبيح وكيطيح الشتاء على الّي كي عمل الخير والّي كي عمل الشر. حيت إذا كتبغيو غير الّي كي بغيوكم شمن أجر عندكم؟.

وعلى الصلاة قال لهم: "مَلّي تكونو كتصليو ماتعملوشي فحال المنافقين، الّي عزيز عليهم يصليو في الديور دالصلاة وفاين كيتلقاو الطرقات باش يشوفهم الناس. هادوك راهم أداو الأجر ديالهم من عند الناس. أما أنتين مَلّي تصلي، أدخل نالبيت ديالك وشدّ عليك الباب وصلّي نالباك في السر، الباك الّي ماكتخفي عليه حتى شي خافية هو الّي عيجازيك".

وعلى الصيام وصاهم وقال: "إذا صمتو، ماتعبسوشي فحال المنافقين الّي كي عبسو وجوههم باش يبينو نالناس بلي هم صايمين. ولكن أنتين مَلّي تصوم، أدهن شعرك و غسل وجهك، حيت ماخصكشي تصوم نالناس بالعكس

خصّك تصوم نالله حيث هو آلي عيجازيك حيث حتى  
حاجة ماكتخفي عليه".

سيدنا يسوع المسيح كانو كيبقاو فيه الناس بزّاف، على  
ديك الشي قال لهم: "ماترفدوشي الهمّ من الناحية د  
المعيشة ديالكم، شنو تاكلو، شنو تشربو أولا شنو تلبسو.  
وقال لهم واش ماشي الحياة مهمة أكثر من الماكلة،  
والدات مهمة أكثر من اللباس؟ شوفو الطيور آلي في  
السماء، راها ماكتزرع ماكتحصد ماكتجمع في بيوت  
الخيرين، و باكم آلي في السما كيرزقها ماتكول. إوا ماشي  
أنتم أحسن منها!" وزاد وصّاهم باش يفتشو في الأول  
على المملكة دالله والإرادة ديالّه، وديك الشي أخور كامل  
هو آلي عيرزقهم بيه.

ـ خصنا نبغيو الناس كاملين فحال فحال حيث الله بغانا  
كاملين بلا شروط.

ـ الله خلى لنا الكلمة ديالّه آلي هي الكتاب المقدس باش  
يوري لنا كيفاش خصنا نعيشو.

- العلاقة ديانا مع الله هي علاقة شخصية ما يهمناشي  
شني كيفكرو الناس علينا.

- إذا كان الله أهم حاجة في حياتنا و كنقلبو دايمًا على  
الرضى ديالّه، غادي نعيشو في الهنا والسلام وراحة  
البال.



## 71: سيدنا المسيح كيهنّ الرّيح في وسط البحار

لوقا 8 و مرقس 4

في واحد النهار، كان سيدنا المسيح والتلاميذ ديالّه في واحد الفلوكة كيقطعو البحر، وملّي كانوا ماشين أدّي ناعس سيدنا يسوع المسيح.

واحد الشويّة، جات شي ريح قويّة، وبدّوا الأمواج كيكبرو بزّاف، حتّى دخل الماء نالفلوكة، حتّى كانت علاين تعمّر بالماء، التلاميذ خافو بزّاف، على ديك الشّي، مشاوا عند المسيح الّي كان ناعس في اللآخر د الفلوكة وبدّوا كفيّقوه، وكيقولو له: " يا ربّي، أعتقنا! راه حنا علاين نغرقوا!"

ديك الساعة ناض يسوع المسيح وأمر الرّيح باش تتهدّن وديك الشّي الّي وقع، تهدّنت الرّيح. ولكن يسوع تعصّب منهم وقال لهم: "علاش خوفانين؟ فاين هو الإيمان ديالكم؟" حيث الإيمان ديالهم في الله كان ضعيف، وبقاوا مشلوطين التلاميذ في ديك الشّي الّي أعمل يسوع المسيح ملّي هدّن الرّيح، وبدّوا كيقولو مع بعضهم: " شكون هو هذا؟ الّي حتّى الرّيح و البحر كيطيّعها!"

- الله تجسّد في المسيح، على ديك الشّي قدر يهدّن  
الريح، وفي نفس الوقت، هو بنادم فحالنا، غير  
الفرق، هو أنه إنسان كامل بلا خطية.
- المسيح ديماً معنا، سواء كنا مرتاحين وفرحانيين،  
أولا ملي كنكونو غارقين بالمشاكيل.
- بالإيمان والتّقة في المسيح، نقدرو نتغلّبوا على  
المشاكيل كاملة ألي عندنا.

## 72: يسوع المسيح كيشافي واحد الراجل مشلول

لوقا 5

في واحد النهار مَلِّي كان يسوع المسيح كيعلّم ، تجمعو عليه بزّاف د الناس من كل قرية من بلاد الجليل و اليهوديّة وأورشليم، حيث سمعو بَلِّي عنده القدرة باش يشافي الناس، وكانت عنده الدار عامرة بزّاف حتّى ما تقدر شي تجبر ماين تدوز، ومَلِّي كان كيعلّمهم، جاو عنده أربعة د الرجال هازين واحد الراجل مشلول فوق واحد المّحمل وما جبرو شي ماين يدخلوه، على ديك الشّي هبّطوه من السطح د الدار عند يسوع المسيح. مَلِّي شاف يسوع المسيح الإيمان ديالهم، قال نالمشلول: "آ وليدي، تغفرت لك الذنوب ديالك".

وكانو تما كالسين شّي كتاب و فرسيين، آلي بداو كيفكرو وكيقولو مع راسهم: "شكون هدا آلي كيهدر هكدا؟ شكون يقدر يغفر الذنوب من غير الله بوحده؟"، في ديك الساعة عرف يسوع فاش كانو كيفكرو وقال لهم: "علاش كتفكرو هكدا؟ شنو آلي ساهل يتقال: تغفرو لك دنوبك أولا : نوض وأمشي؟" ولكن غير باش يعرفو بَلِّي ابن الله عنده القدرة باش يغفر الذنوب، قال يسوع المسيح نالمشلول: "نوض وهزّ المّحمل ديالك وأمشي نالدارك".

و في ديك الساعة ناض الراجل آلي كان مشلول قدامهم كاملين، وهزّ المّحمل ديالّه ومشّى وهو كيمجدّ الإسم د

الله. وبقاوا الناس غير مستغربين وحتى هم في الآخر بداو  
كيمجدو الاسم د الله، وكيقولو: "اليوما شفنا المعجزات".

- المسيح هو المتال ديالنا، كيفما كان كيغطي مثال  
مزيان في أي موطن كان كيمشي له حتى حنا خصنا  
نعطيو صورة مزيانة عليه في أي موطن مشينا له.
- بالإيمان ديك أربعة د الرجال، الله أعمل هد المعجزة  
في الراجل الّي كان مشلول.
- المسيح ماشي غير نبي ولا رسول ولا ملاك، لا،  
حيث هو الله، وهو بوحده الّي قادر باش يغفر الذنوب  
ديالنا كاملين، الّي باينين والّي مخبئين.

## 73: المسيح كيشافي واحد الراجل أعمى

مرقس 10

مَلِّي كان يسوع المسيح خارج من مدينة "أريحا" مع التلاميذ ديالُه، كانوا بزّاف الناس تابعينُه كيفما ديمًا باش يسمعو نالهدرة ديالُه. و في الطريق كان كَالس واحد الراجل أعمى كيسعى، مسمّي "بارتيمائوس"، الّي كان سمع على المعجزات الّي عمل يسوع المسيح وكيفاش شافي الناس آخرين الّي كانوا مرضيين. مَلِّي عرف بَلِّي المسيح كان كائز من حداه، بدى كيغوّت وكيقول: "يا يسوع ولد داوود، أرحمني". ولكن بزّاف د الناس دارو في ديك لعمى وغوتو عليه باش يسكت. ولكن هو بقى كيغوّت أكثر باش يسمعو يسوع. من بعد، وقف المسيح وأمرهم باش يعيّطو له. ومَلِّي يعيّطو له، قالو ديك الناس نديك الراجل: "غير تيق، ونوض، ها المسيح كيبيّط لك"، وديك الساعة سيّب الحوايج الّي عليه، ومشى عنده. ومَلِّي سقصاه المسيح شنو بغى، جاوبُه وقال: "يا ربّي، بغيت غير نولّي كنشوف". جى المسيح ردّ عليه المسيح وقال له: "تقدر تمشي، الإيمان ديالك الّي شافاك". وفي ديك الساعة تشافى ورجع له النظر ديالُه، وتبع ديك الراجل يسوع المسيح.

- الله بغانا نهڊرو معه، ونعيطو له بعض المرّات ونكونو مصرين باش نقولو له شنو بغيئا، حيث هو كيسمعنا وهو واجد باش يستاجب نالصلوات ديالنا.
- مزيان نتكلو على الله في أي حاجة في حياتنا، ولكن ضروري حتى حنا نعملو آلي علينا.
- الإيمان هو آلي كيخاينا ننساو الماضي ديالنا، ونركزو غير في آلي أعمله الله معنا و آلي باقي كيعمله من أجلنا.
- ملي يعمل الله شي معجزة في حياتنا، خصنا نردو له المجد، ونزيدو نتبعوه في الطريق دياله باش نكونو د بالصّح التلاميذ دياله.

## 74: المسيح كيشافي واحد الولد مسكون

متى 17

واحد النهار مَلِّي كان يسوع المسيح مع الناس، جى نَعْنُدُه واحد الراجل وسجد لُه وطلب منُه يشافي لُه ولُدُه الِّي كان مسكون وقال نيسوع: "رحم لي ولدي المسكون الِّي كيتعدّب، راه بزّاف د المرات كيطيح في العافية وفي الماء، وسبق لي جيبته نالتلاميذ ديالك وما قدرو شي يشافيواه". ديك الساعة هدر المسيح مع التلاميذ دياله وهو معصّب عليهم حيث ماقدروشي يشافيو ديك الولد مسكين وقالهم: "يا هَدّ الجيل الِّي ما كيامن شي، حتّى لايّن عنبقى نتحمّلكم؟ وحتى نفوقاش عنبقى معكم؟ جيبوه لي نهنا".

ومشاو التلاميذ وجابو نيسوع المسيح ديك الولد المسكون، وفي ديك الساعة خرّج منُه ديك الجن الِّي كان ساكنه وتشافى. من بعد مَلِّي كان يسوع بوحديته جاو نَعْنُدُه التلاميذ دياله وسقّصّواوه وقالو لُه: "علاش حنا ما قدرنا شي نعملو هَدّ الشي؟" وجاوبهم يسوع وقال: "حيث ما فيكم شي الإيمان، حيث كون كان الإيمان ديالكم غير قدّ هَدّ الحبّة د الخردل كون تقولو نهَدّ الجبل يتحيّد من هنايا يتحيّد، ويطيعكم وحتى حاجة ماتكون مستحيّلة عليكم". وزاد قال ليهم بَلِّي ديك الروح الِّي كانت ساكنة ديك الولد، كتخرج غير بالصلاة والصيام.

- مَلِّي نَبْغِيو نَطْلَبُو شِي حَاجَة مِنْ اللّٰه ، خَصَّنَا نَطْلَبُوهَا بِالْإِيْمَانِ وَالطَّاعَةِ وَالتَّوَاضِعِ.
- القَلَّةُ دَ الْإِيْمَانِ دِيَالِنَا، بَعْضُ الْمَرَّاتِ كَتَكُونُ هِي السَّبَبُ بَاشْ مَا كَنَقْدَرُو شِي نَشُوفُو الْمَعْجَزَاتِ دَ اللّٰهِ.
- إِذَا بَغِينَا نَشُوفُو الْمَجْدَ دَ اللّٰهِ دَ بِالصَّحِّحِ، خَصَّنَا نَصُومُو وَنَصَلِّيُو مِنْ قَلْبِنَا كَيْفَمَا بَغَى مِنَّْا اللّٰهُ.

## 75: المسيح كيوكل أكثر من خمسة آلاف د الناس

مرقس 6

من بعد ما ساق المسيح الخبر من عند التلاميذ ديالُه بلي يوحنا المعمدان مات مدبوح، في ديك الساعة طلب منهم باش يمشيو معاه نشي موطنع باش يرتاحو فيه. ولكن ملي شافوه الناس عرفو بلي هو يسوع المسيح وبدوا كيتبعوه، و هم يعزّو عليه وبقى يعلمهم. وملي جات العشيّة، التلاميذ ديالُه قالو له: "هنايا غير الخلا، والوقت مشي، صيقت ديك الناس فحاليهم يمشيو يشريو ليهم ما ياكلو من الدشورة القريبة، حيث ما عندهم ما ياكلو"، جاوبهم المسيح وقال لهم: "أعطيو لهم أنتم ما ياكلو"، جاوبوه التلاميذ وقالو له: "حنا عندنا غير جوج د الحوتات، وخمسة د الخبزات". حيث كانو أكثر من خمسة آلاف د الناس و أكيد ما عتقدّهم شي ديك جوج حوتات وخمسة د الخبزات.

وهو يطلب يسوع من التلاميذ ديالُه يكلّسو الناس في الأرض، وأعطوا له ديك الماكلة الّي كانت عندهم، جي يسوع هزّ ديك الحوت والخبز وعلى عينه نالسماء، وبارك ديك الماكلة وقطّع الخبز وديك الجوج د الحوتات وأعطاهم نالتلاميذ باش يفرّقوها على الناس. والمعجزة هي كل الشّي أكلى حتّى شبع، والّي شاط من ديك الشّي جمعوه التلاميذ وكانت الشياطة شي أطناشر قفّة. وملي

حسبو شحال من واحد أكلّي، جبرو خمس آلاف د الرجال  
من غير النساء والعواول.

- المسيح بالرحمة والمحبة ديالّه، عزّو عليه ديك  
الناس و عتقهم من الجوع.
- ما خصنا شي ننساو بلّي الله قادر يبارك ديك الشّي  
الّي كيبان لنا قليل باش يوّلّي كثير حتّى يشيط علينا.
- ما خصنا شي نضيّعو البركات الّي ما كحتاجوها  
شي، وخصنا نكونو مسؤولين و نحافظو عليها  
نالناس الّي محتاجينها.

## 76: المسيح كيمشي فوق الماء

مرقس 6

من مور المعجزة آلي أعمال يسوع المسيح آلي وكل فيها أكثر من خمسة آلاف د الناس غير بخمسة د الخبزات وجوج د الحوتات، أمر يسوع المسيح التلاميذ دياؤه باش يركبو في الفلوكة و يسبقوه نواحد الموطع أخور، حيث كان بغى يبقى بوحدّه في الجبل باش يصلي .

جات العشيّة وهو باقي في الجبل كيصلي، والفلوكة آلي كانوا فيها التلاميذ دياؤه كانت في وسط البحر، شويّة وهي تجي شي ريح قويّة بزّاف، وأعياء مايحاولو يرصّيو ديك الفلوكة، ووالو حتى طاح الليل وهم باقين هاكداك، شويّة وهم يشوفو يسوع المسيح ماجي على رجله عندهم فوق الماء، في الأول ظنّو بلي غير شي جنّ. وخافو وبدواو كيغوّتو، و هو يهدر معهم يسوع المسيح وقال لهم: "ما تخافو شي، تيقو بيّا، أنا هو!" ولكن بطرس ما تيقو شي، وقال له: "إدا كونتي المسيح عيط لي نجي نعدك من فوق الماء"، و د بالصحّ، أمره يسوع باش يجي عنده فوق الماء. ولكن بطرس ملّي بدى كيمشي فوق الماء خاف حيث الريح كانت قويّة وأتخلع، وبدى كيغرق، وعيط نالمسيح وقال له: "يا ربّي، نجّيني". ديك الساعة المسيح مدّ له يده وجبده، وقال له: "يا قليل الإيمان، علاش شكّيتي؟" وطلّعه نالفلوكة، و هي تهدنّ الريح. ديك

الساعة جاو نعدّه التلاميذ آلي كانوا في الفلوكة و سجدو له وقالو له: "في الحقيقة أنتين هو ابن الله".  
وملي وصلو فاين كانوا باغيين يمشيو، نزلو في واحد الموطع مسمي "جنيسارت"، وهم يجيو عندهم الناس د ديك الموطع كاملين، وجابو معهم الناس آلي مرضين نالمسيح باش يشافيهم، و بعض من هدوك آلي كانوا مرضيين كانوا بالنية ديالهم غير كيحاديو في الحوايج ديسوع المسيح كيتشافو غير بالإيمان ديالهم.

- قبل ما نبدأو نعملو أي خدمة، يكون أحسن إذا أعطينا من الوقت ديالنا نالله، باش نهذرو معه، ونشكروه على الحاجات آلي أعطانا من قبل، كيفما عمل المسيح مع الأب.
- الإيمان ديالنا ما خصوشي يتأثر بالظروف، وحتى إذا وقع هد الشّي الله واجد باش يعاوننا ويقوي الإيمان ديالنا.
- الله كي عمل المعجزات في الحياة كل واحد فينا على حسب الإيمان دياله، كيفما آمنو هد الناس ملي حداو الحوايج د المسيح.

## 77: المسيح كـيحيي العازر من الموت

يوحنا 11

كان واحد الراجل مسمي "أليعازر" مريض بزّاف أليعازر هدا هو خاها د مريم ألي بالمعزة ديالها نيسوع مسحت بالشعر ديالها الرجلين د سيدنا يسوع المسيح، في ديك الوقت كانت مريم صيفّطت جوج دخوتها نعند يسوع بواحد الرسالة كتقول له فيها: "يا سيدي، ها ألي عندك عزيز مريض" كانت كتقصد بكلامها أليعازر حيث كان عزيز على يسوع المسيح.

وملي سمع يسوع المسيح ديك الهدرة قال نالتلاميذ دياله بلي ديك المرض ألي في أليعازر ماكيقتل شي، ولكن باش يتمجد الإسم د الله الأب والإبن، ما مشى يسوع نعندهم نالدار حتى كازت أربع أيام .

إيوا ملي وصلو، قالولهم بلي أليعازر مات و دفنوه هدي أربع أيام. وديك الشّي خلى خوته يكونو حزنانيين بزّاف. وملي وصل نعندهم المسيح تلاقته غير خته مرثا، أما مريم ما تلاقته شي بقات غير في الدار. وبدات مرثا كتلوم يسوع المسيح، وكتقول له: "كون كونتي هنا كون ما مات شي خانا، ولكن حتى دابا كنعرف بلي كل الشّي ألي كتطلب من الله كيعطيه لك". جاوبها يسوع وقال: "أنا هو الحياة والقيامة ألي كيأمن بيّا، وحي يموت عيحيي، وألي أمن بيّا وهو حيّ عمره ما يموت، واش كتأمن بهد الشّي؟". وديك الساعة جاوبأته مرثا وقالت: "أه

يا ربّي، أنا كَنَامن بلي أنتينَ المسيح ابن الله، ألي جي نالعالم".

ومشى يسوع هو وخوئته د أليعازر وشي ناس آخرين نالموطع فاين مدفون أليعازر، هدي أربع أيّام. وملي وصلو طلب من شي واحدين يحيّدو الحجرة من قدام القبر ديالّه، وبالقوة د الروح القدس يسوع عيط له: "أليعازر، خرّج"، وردّ له الروح ديالّه وهو يخرج أليعازر من القبر حيّ، الناس ملي شافو ديك الشّي تعجبو وأمنو بسيدنا يسوع المسيح.

- إذا بغينا نطلبو شي حاجة من الله، من الأحسن نستناو الله فوقاش يجاوبنا، و مانبقاو شي نتشكاو علاش تعطلّ علينا.
- الله بغانا نمجدو إسمه في أي وقت و مهما كانت الظروف، حيت هو ألي قادر يبدّل كل الشّي نالخير.
- إذا كنا كَنَامنو بيسوع، وحيّ نموتو عتكون عندنا الحياة الأبدية.

## 78:ملي شبرو ليهود سيدنا المسيح وحكمو عليه

لوقا 22

ملي كان يسوع المسيح كيصلي في واحد الغرسة بزا  
أورشليم، الي كتسمي القدس، كان حزين بزاف، حيث  
كان عارف بلي قرب الوقت دياله باش يموت. وكانو معه  
حتى ثلاثة من التلاميذ دياله، الي هم بطرس ويوحنا  
ويعقوب. فطلب منهم يسوع المسيح يقصرو معاه باش  
يصليو، ولكن غلبهم النعاس وما قدرو شي يقصرو باش  
يصليو معاه.

و في واحد الوقت وهو يشوف يسوع المسيح شي ليهود  
ماجيين عنده ومعاهم "يهودا الإسخريوطي" الي كان  
واحد من التلاميذ دياله، و مشى غدره مقابل الفلوس ،  
وشكّم بيه وورى نليهود فاين كاين يسوع المسيح. وهكذا  
شبرو ليهود يسوع وبغاو يديواه، وهو يشوفهم التلميذ  
دياله بطرس و ما صبرشي وجبّد السيف دياله باش يدافع  
على الله، وشير به على واحد من ديك ليهود حتى قطع  
له ودنه. جى يسوع وقال نبطرس: "ردّ السيف ديالك  
نالموطع دياله. راه الي كيقتل بالسيف، بالسيف كيموت"  
ووخي هم جاو باش يديواه يصلبوه، يسوع شفى ديك  
ليهودي الي قطع له بطرس ودنه ورجّعها له نموطعها  
كيفما كانت، حيث الله كان كيصرف كل الشّي الي عيوق .  
ملي ليهود شبرو المسيح، أداوه نعد الرئيس د الكهنة  
باش يحكم عليه، من بعد الرئيس صيفطه نعد الوكيل.

ليهود عدبو المسيح بزّاف قبل ما يصلبوه، وشحال  
تكرفسو عليه العسكر وزبّلو فيه وعايروه. ولكن الوكيل  
ما بغى شي يحكم عليه، حيت جبرو برئ، ولكن ليهود  
بداو كيغوّتو وكيطلبو منه باش يصلبه. وكذبو عليه،  
وجابو حتّى الشهود د الزور باش يشهدو ضدّ يسوع.  
ولكن هو بقى ساكت و ما ردّ شي عليهم، وفي الآخر  
حكمو عليه باش يتصلّب.

- مّلي ندوزو في شي وقت صعيب، خصنا نقصرو  
ونصلّيو باش نبقاو ثابتين في الإيمان ديالنا.
- الطمع كيخّلّي بنادم يشوف غير في الربح ديالّه، حتّى  
كيوصلّه نالخيانة.
- الله ما محتاج شي ندافعو عليه، حيت كل الشي في  
يدّه. ولكن بغى يشوفنا كنطيعوه ، كيفما طاع يسوع  
الموت وهو ساكت .
- ما عمّرنا نتفاجئو إذا جرّات علينا العائلة ديالنا  
بسباب الإيمان، أولا تعدّاو علينا، حيت حتّى المسيح  
وقع له هدشي .

## 79: الموت د يسوع المسيح فوق الصليب

كان نهار الجمعة، مَلّي اليهود جرجرو المسيح وتعدّاو عليه، ضربوه وبزقو عليه وبدّاو كيسوطوه، ووصلت بهم الوقاحة حتّى عملولّه التاج د الشوك فوق راسّه وبدّاو كيسجدولّه وكيستهبزو به وكيقولو له: "آ الملك د اليهود".

ومن بعد ما ضربوه، مشاو به ليهود نالموطع فاين عيصلبوه. من قوة مجروح ما قدر شي حتّى يهزّ الصليب ديالّه، ديك الساعة أمرو ليهود واحد الراجل مسمي "سمعان" من القيروان، باش يعاون المسيح ويهزّ الصليب ديالّه فعوطه.

وهم ماشين به، شاف يسوع في الطريق من بين الناس الّي حاضرين شي النساء كيبيكيو عليه. مَلّي وصلو، دقّو العسكر المسّمار في اليدين والرجلين د يسوع على الصليب، وحيدو له الحوايج ديالّه وقسموهم على أربعة وأعملو بهم القرعة باش يشوفو شكون عيدّيهم. وهو معلق فوق الصليب، بقى كيشوف في الناس الّي كيسلبوه والّي كدبو عليه وكيقول: "يا الأب غفر لهم، حيث هم ما عارفين شي شنو كيعملو". وكانو مصلوبين مع يسوع جوج د الشفّارة، واحد كان على الليمين ديالّه وأخور على الشمال. جى واحد منهم وبدى كيستهبزاً بيسوع وكيقول: "إدا كنت ابن الله، أعتق راسك وأعتاقنا معك". ولكن أخور جاوبه وقال له: "واش ما كتخاف شي من الله؟ حنا حكمو علينا بجوج بالموت حيث كنستاهلو. ولكن

هو ما أعمل حتّى حاجة". وقال نالمسيح: "يا ربّي، تفكّرني مّلي تمشي نالملكوت ديالك". وفي ديك الساعة ردّ عليه المسيح وقال: "اليوما عتكون معيا في الجنة". ومّلي بدات كتخرج الروح من يسوع، غوّت واحد الغوتة قويّة من الحريق الّي كان فيه، وقال: "يا ربّي، يا ربّي، علاش خلّيتني؟"، وفي ديك الساعة تقطّع الحجاب د المعبد من الفوق حتى نتحيت، وقال يسوع نالله: "صافي. كل الشّي تكمل يا بابا، بين يدّيك كنخلي الروح ديالي"، ومات في الحين.

- باش ننجاو ويكون عندنا الخلاص، المسيح تعدّب بزّاف وتحمل الحريق من أجلنا غير باش يعطينا الغفران .
- الله كيغطي نكل واحد فينا الفرصة باش يتوب، على ديك الشّي خصنا نستغلّوها، ونركّزو غير على الحياة الأبدية، حيت هد الدنيا فانية.
- بالموت د يسوع، كملت الخطّة د الله، وما بقى لنا غير نأمنو به ونتبعوه باش تكون عندنا الحياة الأبدية.

## 80: القيامة د سيدنا يسوع المسيح

متى 27\_28

ملي علّو العسكر د ليهود المسيح فوق الصليب باش  
يصلبوه، بقى مسكين معلق تمّا شي ستّة د السوايع عاد  
مات. من بعد جى واحد الراجل لا باس عليه من  
"الرامة"، مسمي "يوسف"، ونزل الجسد د سيدنا المسيح  
من فوق الصليب، و أداه نواحد القبر جديد، و دفنه تمّا  
كيفما بغى الله.

حزنو على سيدنا المسيح التلاميذ ديهاله بزّاف، والناس  
كاملين الي كانوا قرابين منه، وما فهمو شي علاش مات،  
وخي المسيح كان قال لهم من قبل بلي عيتعدّب ويتصلّب  
حتى يموت، وفي النهار التالت عيقوم من بين الأموات.  
ايوا في النهار التالت مشات مريم المجدليّة وواحد مريم  
أخرة على النبوري نالقبر الي تدفن فيه يسوع المسيح ،  
ومشاو معاهم حتى شي نساء نالقبر د المسيح باش  
يحنطوه، كيفما العادة عندهم تمّا. ولكن ملي وصلو،  
جبرو الحجرة د القبر محيطة من الباب د القبر، وما فيه  
حتى حاجة، وهم يتصدمو. وديك الساعة بانولهم جوج د  
الملائكة وقالو لهم: "علاش كتفتشو على الحيّ في الوسط  
د الميتين، راه قام كيفما كان قال لكم من قبل". وملي  
رجعو ديك النساء، مشاو عند التلاميذ وعاودلهم شنو الي  
وقع كامل وبلي جبرو القبر د المسيح خاوي وخي كانوا  
العسكر كيحسو تمّا والحجرة كانت ثقيلة بزّاف. التلاميذ

مَلِّي سمعو ديك الشّي ماتقوشي بهم، وظنّو بَلِّي ديك  
النساء غير كيخرّفو، حيت كانو حزنانيين بزاف على  
الموت د يسوع المسيح.

ولكن بَطْرُس ويوحنا مشاو حتّى نالموطع د القبر باش  
يتأكدو، وهم جبروه حاوي، وعاد تفكّرو شنّو كان قال لهم  
يسوع من قبل ما يتصلّب، وهم يآمنو به وبالهدرة ديالُه.

- أي حاجة قال لها لنا المسيح أولا واعدنا بها، خصّنا  
نتيقوها وما نشكّو لا في الهدرة ديالُه ولا في الوعد  
ديالُه، حيت هو صادق وأمين.
- خصّنا نتحدّاو الظروف الصعبة الّي كندوزو منها  
كيفما كانت، ونبقاو ثابتين في الإيمان ديالنا.
- خصّنا نكونو متأكدين بَلِّي عندنا الحياة الدائمة، حيت  
الله أعطانا العربون، الّي هو سيدنا المسيح الّي غلب  
الموت بالقيامة ديالُه.

## 81: المسيح كيبان نالتلاميذ ديالهُ

يوحنا 20

مشاو التلاميذ د يسوع المسيح بَطْرُس ويوحنا ن عند الناس فرحانين وهم كيقولو لهم: "يسوع قام، بالحق يسوع قام من الموت". وفي ديك الساعة كانت مريم المجدلية قدام القبر ديالهُ كتبكي وهو يظهر لها المسيح، في الأول ما عرفته شي حتى هدر معاها وقال لها باش تمشي تعلم الخوت أخرين بلي هو قام من الموت. وفي نفس النهار، في العشية كانوا التلاميذ كاملين مجموعين من غير "توما"، وكانو شادين عليهم الباب حيث كانوا خوافانين من ليهود. واحد الشوية وهو ظهر لهم يسوع، وقال لهم: "السلام عليكم" وحيث كانوا مشلوطين وورى لهم يسوع الأتار د المسامرالي باقي في يده و الجناح ديالهُ باش يتيقنو بلي هو المسيح. فرحو التلاميذ بزاف ملي شافوه باقي حي. وهكذا ودّعهم المسيح وقال لهم: "السلام عليكم، كيفما صيفطني الأب، نصيفطكم أنا ن عنده". ونفخ وقال لهم: "قبلو الروح القدس".

وحيث توما ما كان شي معهم، قال نتلاميذ ديسوع ملي عاودوله شنو وقع: "ما نتيقن بلي المسيح قام حتى نشوف الأتر د المسامر في يده و نحادي يدي في الجناح ديالهُ". ومن بعد شي سيمانة، ظهر المسيح نالتلاميذ ديالهُ مرة أخرة في نفس الموطع، وهد المرة كان معهم حتى توما. جى يسوع و هدر مع توما وقال له: "أرى يدك، يا

توما، وشوف اليدين ديالي، وحادي الجناح ديالي، وما يكون شي فيك الشكّ وأمن". ديك الساعة جاوبه توما وقال له: "أنتين ربّي والله ديالي". وردّ عليه يسوع وقال: "واش حتّي شفّتي عاد أمتي؟ سعادات هدوك الي آمنو بلا ما شافو".

ومن بعد ظهر يسوع بزّاف د المرّات نبزّاف د الناس. ومن بعد 40 يوم ظهر لهم آخر مرّة ملّي كانوا خارجين من المدينة. وباركهم وصلّى من أجلهم، ووصّاهم باش يمشيو عند الناس كاملين، كل قبيلة ولغة، ويبشّروهم بالنجاة د المسيح، ويعمّدوهم بالماء ويعلموهم كيفاش يمشيو في الطريق د الله الي ورّى لهم، وهو عيكون معهم الأيّام كاملة حتّي نالنهاية د العالم.

وملّي كمل الهدرة دياله طلع سيدنا المسيح نالسماء، وهم وبقاو كيشوفو فيه حتّي ما بقى شي كيظهر لهم. وجاوا شي جوج د الملائكة هدرو مع التلاميذ، وقالو لهم: "مالكم بقيتو مشلوطين؟ راه كيفما كتشوفو المسيح اليوما هيدا طالع نالسماء، هيدا عيجي مرّة أخرة في المجد دياله".

- المسيح قادر ببذل الحزن ديالنا بالفرحة، ويجيب السلام لنا حيث هو حيّ.
- مزيان نأمنو بالله بلا ما نستتأو نشوفوه، حيث الله صادق في كلامه وما كيكذب شي.
- المسيح ديماً معنا، وأحسن حاجة خلاها لنا هي الروح القدس الّي فينا، والّي كيعزّينا .
- خصّنا نعملو بالوصيّة د المسيح، وما نخبّعو شي الإيمان ديالنا على الناس، بالعكس نهدرو معاهم ونورّيو لهم كيفاش يمشيو في الطريق د الله.

## 82:المجّي د الروح القدس

### أعمال الرسل 2

كيفما عرفنا من قبل، المسيح طلع نالسماء مور ماضهر نالتلاميذ ديالهُ. إيوا في النهار الخمسين، كان عند ليهود العيد د الحصاد، وجاو بزّاف منهم نأورشليم، من كل بلاد باش يحتفلو ويشكرو الله على الغلّة الّي أعطى لهم، كيفما العادة عندهم. وكانو التلاميذ د المسيح والمؤمنين آخرين مجموعين تمّا حتّى هم. شويّة، وهم يسمعو شي صوت من السماء، فحال الرعد، وجات شي ريح قويّة، ونزلت شي لهبة دالعافية فحال اللسان على الناس كاملين، وتعمّرو المومنين بالروح القدس د الله، وبداو كيهدرو باللغات أخرة كيفما بغى منهم الروح القدس، كان كل واحد فيهم كيسمع أخور كيهدر باللغة ديالهُ، وشي ناس بقاو متعجبين وبداو كيقولو، " ماشي هدو الّي كيهدرو من الجليل وكيفاش كيسمع كل واحد فينا اللغة د الأم ديالهُ؟" حيت كان كل واحد منهم من موطن مبدّل. وشي واحدين آخرين بداو كيستاهزو وكيقولو: " واش هدو سكرانين؟".

جى التلميذ ديسوع المسيح الّي مسمي بَطْرُس وبدى كيهدر معاهم حيت ماعجبوشي الحال على الهدرة الّي قالو وقال لهم: "هدوك ماشي سكرانين كيفما كتضنّو حيت دبا راها التلاتة د النهار"، وفكّرهم بالنبوّة الّي جات على اللسان د النبي بيوتيل في العهد القديم الّي كيقول

فيها: "بلي الله عيّمّر الناس بالروح القدس، من كل لغة وبلاد، وديك الشّي الّي وقع دابا". وبدى كيعاوند لهم على كل حاجة وقعت نالمسيح، وعلى الخلاص الّي جاب نالناس كاملين، وبلي ديك الشّي كامل كان الخطّة د الله، الّي أعملها قبل ما يخلق العالم. وكمل بهد الهدرة: "هدا يسوع الّي صلّبته أنتم رجّعه الله ربّ ومسيح (منجّي)".

وبزّاف د الناس الّي كانوا تّمّا بداو كيجيو نعدن بّطرس وكيقولو له: "شّنو خصّنا نعملو؟" وكان كيرّد عليهم، وكيطلب منهم يتوبو ويتعمّدو باسم المسيح باش ينجاو من الدنوب ديالهم وهكذا يسكن فيهم الروح القدس. وفي ديك النهار العظيم، آمنو بيسوع وتعمّدو تقريبا 3000 واحد. ومن ديك الوقت بداو كيجتمعو كل النهار، باش يصلّيو ويعلمو الناس ويتعلمو مجموعين. وكانو كيتشاركو كل الشّي مع بعضهم، الّي كانت عنده شي حاجة كان كيجيبها بالفرحة ويعطيها نالتلاميذ باش يقسمها مع المؤمنين آخرين. وكانو كاملين فرحانين وكيحمدو الله ويشكروه .

- الله ديمًا صادق في الوعد ديالته معنا، و كيقققه، غير باش الناس آخرين يتوبو ويأمنو به .
- الإرادة د الله هي يأمنو به الناس كاملين، ماشي مهم شمن شعب ولا شمن لغة كيهدرو.
- مّلي كيسكون فينا الروح القدس، كيحيدّ منّا الخوف، وكيعمّرنا بالفرحة والسلام والمحبة، وهكذا كتّبنى الكنيسة د الله.
- إذا كنا كمؤمنين متّحدين، عنعطيو واحد المتال مزيان على المسيح نالناس آلي ماشي مؤمنين، وبهد الشّي عيتمجّد الاسم د الله.

## 83: الموت د إستيفانوس

أعمال الرسل 6-7

من النهار الخمسين من مور الموت والقيامة د سيدنا المسيح، بداو بزّاف د الناس كيأمنو بالمسيح. والتلاميذ ديالّه حتّى هم بداو كي عملو المعجزات فحالّه، وحتى المؤمنين آخرين بداو كيعاونهم. وكان "إستيفانوس" واحد الراجل معمر بالروح القدس. الّي كان كيواجه الفقهاء وليهود الّي متشدّدين في الدين وكيوقفهم على حدّهم، وديمّا كان كيغلبهم بالهدرة ديالّه و الحكمة الّي أعطاه الله بالروح القدس. ولكن ليهود ما كانوا شي كيرضاو بديك الشّي، وخصوصاً مّلي كان كيشرح لهم شّي بغى الله منهم، أولاً مّلي وكيهدرلهم على النبؤات كاملين الّي هدرّو على يسوع في العهد القديم. إستيفانوس كان قاصح مع ليهود في الهدرة ديالّه، وكان كيقلولهم بلي هم فحالهم فحال جدودهم، القلب ديالهم قاصح، و بلي قتلوا الأنبياء ورفضوا النبؤات والهدرة د الله. وحيث كانوا على سبّة، بداو كيغوّتو عليه وكيقلولو نالناس باش يخرّجوه على برّا ويرجموه، وديك الشّي الّي وقع. خرّجوه، و مّلي بداو كييرجموه، على إستيفانوس عينه نالسماء وقال لهم: "كنشوف السماء مفتوحة، والمسيح واقف على اليمين د الأب". وديك الساعة زادو تعصّبو منه وبداو كييرجموه أكثر.

وملّي قرّب إستيفانوس مسكين يموت هدر مع الله، وقال  
لُهِ: "يا ربّي، قبل الروح ديالي"، وطاح على ركابُه وزاد  
قال: "يا ربّي، ما تحسب شي هد الخطية عليهم، أغفر لهم  
حيث ما عارفين شي شنو كي عملو"، ومات.

- مزيان نكونو كنعرفو الكتاب المقدّس. ولكن ألي مهم  
أكثر، هو نأمنو به ونعملو بلي فيه، باش نعطيو  
المتال د المسيح.
- الإيمان ديالنا بالمسيح، يقدر يخلي الشيطان يأدينا  
أكثر. على ديك الشّي خصّنا نكونو واجدين لهُ .
- حتى حنا خصّنا نغفرو نالناس ألي كيستعملهم  
الشيطان ضدّنا كيفما أعمل المسيح و إستيفانوس.

## 84: من العدو د المسحيين نمبشر د المسيح

أعمال الرسل 9

كان واحد الراجل مسمي "شاول الطرسوسي"، واحد من ليهود المتشددين، الي كيجبس الناس المومنين بالمسيح وكيعذبهم. وحتى هو كان حاضر ملي مات إستيفانوس، وكان عاجبه الحال بالموت دياله.

واحد النهار ملي كان ماشي ندمشق باش يشبر شي مؤمنين تما، وهو ماشي في الطريق شاف شي ضو فحال البرق. وهو يطيح على وجهه وديك الساعة سمع شي صوت من السماء، كيهدر معه، وكيعيط له: "شاول شاول، علاش كتعدبني؟ وجاوبه شاول وقال: "شكون أنتين؟"، ردّ عليه الله وقال: "أنا يسوع الي كتعدبه". وجاوبه شاول وهو خوفان وصقصاه: "يا ربّي شنو بغيتني نعمل؟". ديك الساعة الله أمره باش ينوض ويدخل نالمدينة، وتما يتقال له شنو يعمل.

الناس الي كانوا ماشين مع شاول بقاو واقفين وهم ساكتين حيث كانوا كيسمعو كل الشّي ولكن ماقدرو يشوفو والو. ناض شاول من الأرض، وما بقى شي كيقدر يشوف وولّي أعمى. وبقى هكداك شي 3 أيّام في شي دار بلا مأكلة ولا شراب.

و في ديك المدينة، كان واحد الراجل مؤمن بزّاف مسمي "حنانيا"، جى نعهده الله في واحد الرؤيا، وأمره باش يمشي نالموطع فاين كاين شاول كيصلي باش يردّ له

النظر ديالُه. ولكن حنانيا خاف حيت سمع على شاول بزّاف وأعرف بلّي هو جى غير باش يعدّب المؤمنين الّي في دمشق ويجرّي عليهم. ولكن الله طمأن حنانيا وقال له: "غير مشي نعهده حيت أنا اختارته باش يهزّ بالإسم ديالي قدام الملوك وليهود وحتى الأمم الآخرين. وعنوريّه شحال خصّه يتعدّب على إسمي"، ديك الساعة طاع حنانيا الله ومشى. وملي وصل جبر شاول في الدار، دخل نعهده وأعمل عليه يده، وردّ له النظر ديالُه وتعمّر بالروح القدس. وفي الحين رجع كيشوف وناض وتعمّد في الماء.

من بعد شاول بدى كيبشّر بالإسم د المسيح في كل معبد، وكيقول نالناس بلّي المسيح هو ابن الله، وهم كانوا متعجبين، كيفاش الّي كان كيعدّب المسحيين رجع دابا هو الّي كيبشّر بالإسم د الله ديالهم .

- بزّاف د الناس بغاو يرضيو الله بالأعمال، ولكن هو مابغى منّا غير نسلّموا له قلوبنا.
- حتّى واحد ما يقدر يقاوم المسيح، حيث القوّة دياله فوق كل قوّة.
- مّلي نكونو حيرانين، نصليو ونطلبو من الله باش يورّي لنا شئو نعملو. وهو عيعطينا الجواب.
- نقدر و نخافو، ولكن خصّنا نتيقو في الله. حيث هوّالي كيعطينا القوّة والقدرة باش نواجهو كل حاجة صعبة.
- فحال شاول، الله عنده خطة نكل واحد فينا، باش يكمل الإرادة دياله معاه.

## 85: بَطْرُسُ كَيْبِشْرُ بِالْمَسِيحِ

أعمال الرسل 2

بَطْرُسُ كَانَ وَاحِدًا مِنَ التَّلَامِيذِ الْأَوَّلِينَ دَ سَيَدِنَا يَسُوعَ الْمَسِيحِ، هُوَ وَخَاهُ "يَعْقُوبُ" الّٰي كَانُوا غَيْرَ صَيَادَةِ دَ الْحُوتِ. فِي النَّهَارِ الْخَمْسِينَ مَلَّى نَزَلَ الرُّوحُ الْقُدُسُ عَلَى الْمُؤْمِنِينَ هُوَ كَانَ وَاحِدًا مِنْهُمْ. وَهُوَ الّٰي كَانَ بَشَرًا وَوَجَّهَ لِيَهُودِ الْمُتَشَدِّدِينَ، وَفَضَحَهُمْ، وَقَالَ لَهُمْ بَلِّغُوا هُمُ الّٰي صَلَّبُوا الْمَسِيحَ وَقَتَلُوهُ. وَلَكِنْ كَانَتْ عِنْدَهُ وَاحِدَةُ الْفِكْرَةِ غَالِطَةً حَيْثُ كَانَ كَيْظَنُّ بَلِّغَ الْخَلَاصِ جِي غَيْرِ نَالِيَهُودِ، وَبَدَى كَيْبِشْرَهُمْ غَيْرَهُمْ، وَكَانَ كَيْتَهَرَّبُ يَكُلِّسُ مَعَ النَّاسِ أُخْرَيْنَ.

وَفِي وَاحِدِ النَّهَارِ مَلَّى كَانَ كَيْصَلِّي، شَافَ وَاحِدَ الرُّؤْيَا: كَانَ كَالسَّيْفِ وَشَافَ السَّمَاءَ مَفْتُوحَةً، وَاحِدَ التُّوبِ نَازِلًا مِنَ السَّمَاءِ عَامِرًا بِالْحَيَوَانَاتِ وَالطُّيُورِ. وَسَمِعَ شَيْءًا صَوْتًا مِنَ السَّمَاءِ كَيْقُولَ لَهُ: "نُوضُ وَقَتْلُ وَكَوْلٌ". جَاوَبَهُ وَقَالَ: "مَا يُمْكِنُ لِي شَيْءٌ، يَا رَبِّي. مَا عَمَّرَنِي كَلَيْتَ حَتَّى حَاجَةَ حَرَمَتِهَا". وَرَدَّ عَلَيْهِ الصَّوْتُ: "الّٰي حَلَّلَ لَهُ اللَّهُ مَا تَرَجَّعْتَنِي حَرَامًا". وَتَعَاوَدَ مَعَهُ هَذَا الشَّيْءُ ثَلَاثَةَ دَ الْمَرَّاتِ. وَلَكِنْ بَطْرُسُ مَا فَهَمَ وَالْوَمِنْ دَيْكَ الرُّؤْيَا.

وَكَانَ وَاحِدَ الْعَسْكَرِيِّ مَسْمًى "كَرْنِيلْيُوسَ" فِي مَدِينَةِ "الْقَيْصَرِيَّةِ"، الّٰي وَخَى مَاشِي لِيَهُودِي، كَانَ هُوَ وَالْعَائِلَةُ دِيَالَهُ كَيْعْبُدُوا اللَّهَ، وَكَيْصَلِّيُو دَيْمًا. وَحَتَّى هُوَ شَافَ وَاحِدَ الرُّؤْيَا، وَهَدَرَ مَعَهُ شَيْءًا مَلَكَ، وَقَالَ لَهُ بَاشَ يَصِيْفُ شَيْءًا

رجال يطلبو من بطرس يجي عنده. وديك الشّي الّي  
أعمل. ملّي وصلو ديك الرجال عند بطرس، هدر معه  
الروح القدس وقال له باش يمشي معهم. و مشى معهم  
حتى نالقيصرية فاين ساكن كرنيليوس. وكانت هديك أول  
مرّة كيدخل فيها بطرس نشي دار ماشي د ليهود، في ديك  
الساعة كل واحد عاود الرؤيا دياله ناخور. وهكذا فهم  
بطرس شنو الّي كان بغى الله يقول له. وهدر مع  
كرنيليوس والعائلة دياله، وقال لهم: "دابا عاد فهمت بلي  
الله ما كيفضل شي شي أمّة على أخرة، ولكن الّي كيخاف  
الله وكيّتقيه من كل أمّة هداك هو الّي مقبول عنده. والله  
ماشى غير ديال ليهود، ولكن ديال الناس كاملين الّي في  
العالم". ومن بعد عاودلهم بطرس على كل الشّي الّي  
وقع مع المسيح من الأول دالخدمة دياله حتى ترفع  
نالسماء. وهو باقي كيهدر معهم، نزل الروح القدس على  
الناس الّي كانوا كيسمعوليه.

وملّي رجع بطرس نالكنيسة، عاودلهم كل الشّي الّي وقع  
له في القيصرية. ولكن ليهود المؤمنين ما كانوا شي  
متافقين معه على ديك الشّي، ولكن ملّي زاد عاود لهم  
حتى على الرؤيا دياله والرؤيا ديال كرنيليوس، وشنو  
وقع تمّا، وقال لهم: إذا الله أعطى ليهم الروح القدس  
فحالنا، شكون أنا حتى نمنع الله". ديك الساعة عاد سكتو  
ليهود، ومجدو الله وقالو: "د بالصحّ الله أعطى نلامم  
الحياة الأبدية حتى هم".

- مَلِّي كَنكونو قرايين من الله، إِدا كانت عندنا شي فكرة  
غالطة على الناس، هو كيتدخل باش يصحح لنا هد  
الفكرة.

- الله كيستعمل بزّاف د طرق باش يورّي لنا الإرادة  
دياله فحال شي الرؤيا أولا حلم.

- الله ماعمره كي عمل الفرق بين الناس، حيث كيبيغينا  
كاملين فحال فحال، وبغانا نتوبو له باش ننجاو من  
الموت .

## 86: بَطْرُس كِيدخل نالحبس

أعمال الرسل 12

مَلّي بداو المؤمنين كيبشّرو بالمسيح، ما عجبوشي الحال الملك هيرودوس وبدى كيتعدّي و كيعدّب كل واحد كيأمن بسيدنا المسيح منهم الناس الّي في الكنيسة. وباش يخوف الملك هيرودوس المومنين قتل يعقوب خاه د يوحنا، وعاد مَلّي شاف بلي اليهود أعجبهم الحال دخل حتّى بَطْرُس نالحبس، وأمر أربعة د العساسة باش يربطوه بالسناسل ويحديواه عندك يهرب. حيت كان خصّه يسلمه ناليهود مور عيد الفصح ديالهم، و في ديك الوقت كانت الكنيسة كاملة كتصلي من أجله. وفي الليلة الّي كان ناوي فيها هيرودس يعطي بطرس ناليهود، كان بطرس ناعس، شويّة وهو يجي نعهده واحد الملاك وضوى له البيت كامل و حدى بطرس في الجنب دياله حتّى فاق، وقال له: "نوض دغيا، وألبس الصبّاط ديالك وأتبعني". وطاحو السناسل الّي كان مربوط بهم بطرس ومشى تبع الملاك كيفما قاله وهو مامتيق شي سحابله غير كيحلم، ومَلّي خرّجه الملاك من الحبس عاد تأكد بطرس بلي ديك الشّي وقع دبالصّح، وقال: "دابا تأكدت بلي الله صيفط الملاك دياله باش ينقذني من اليد دهيرودوس وليهود". مور ديك الشّي مشى بطرس نالدار د "مريم" ماماه د يوحنا، فاين كانو مجموعين بزّاف د المؤمنين كيصلّيو. ومَلّي وصل، دقّ في الباب وهي تردّ عليه واحد الخدّامة ومَلّي سمعت

الصوت د بَطْرُس، ما تيّقت شي ومشات كتجري وقالت لهم بلّي بطرس في لباب ولكن هم ما تيقوها شي، وهكذا بقى كيدقّ حتّى فتحوا له الباب، وملّي شافوه المؤمنين الّي كانوا تمّا بقاو مبهوطين خصوصا ملّي عاودلهم كيفاش خرّجه الله من الحبس.

ملّي صباح الصباح مشى قتل هيرودوس ديك العساسة الّي كان أمرهم باش يحديو بَطْرُس حيث هرب لهم .

- خصّنا نكونو واجدين باش نبشّرو بالكلمة د الله، وفي نفس نكونو واجدين نتكر فصوصن أجل إسم دالله، حيث الشيطان ما عمره عيفرح بديك الخدمة.
- ملّي نكونو كنتعدّبو في الإسم د الربّ، خصّنا نتيقو غير فيه حيث هو الوحيد الّي يقدر ينقدنا .
- الشيطان ما عندو شي السلطة مرّة على المؤمنين حيث الله قوي عليه .
- الصلاة د المؤمنين في الكنيسة مهمة بزّاف، حيث هي السلاح الّي كنواجهو به الشيطان والجنود دياله.

## 87: الكنيسة كتصيفت برنابا وشاول باش يبشرو

أعمال الرسل 13

ملي كانو التلاميذ ديسوع المسيح مجموعين في واحد الكنيسة في "أنطاكية"، منهم برنابا وشاول. وفي واحد النهار وهم صايمين كيعبدو الله هدر معهم الروح القدس وقال لهم: "خصصو لي برنابا وشاول باش يعملو الخدمة الي موجدوها لهم"، وهكذا تجمعو التلاميذ وخطو اليدين ديالهم على برنابا وشاول وباركوهم، وهكذا برنابا وشاول طاعو الهدرة د الروح القدس ومشاو من مدينة سلوكية نقبرص حتى نأفوس وكانو كيبشرو في كل موطن مشاوله بالبشارة دسيدنا يسوع المسيح، وملي سمع هد الخبر الوالي د قبرص عيط عليهم باش يهدرو معاه شوية على الكلمة د الله، وكان معه حتى واحد الراجل سحار مسمي "عليم"، الي كان ما بغى شي الوالي بيدل الإيمان دياله. وهكذا بولس الي هو شاول تعمّر بالروح القدس، وبدى كيهدر مع ديك الراجل السحار، وكيقول له بلي هو واحد من الأولاد د الشيطان، و بلي عامر غير بالشر، وبلي كيعوج الطريق د الله، وعلى ديك الشّي عيولي أعمى واحد الوقت قصير. ويلاه كمل بولس الهدرة دياله وديك السحار يولي أعمى، تشلط الوالي وبقي غير كيشوف فيه وهكذا أمن بالرب .

مور ديك الشّي الي وقع مع الوالي مشاو التلاميذ نمدينة أخرة مسمية "بيسيدا"، ودخلو نشي معبد تمّا. وفي النهار

السبت بداو كيبشرو نليهود على المسيح، وشنو أعمل الله مع الشعب دياله، من الأول د النبؤات حتى نالمجي د المسيح، وكيفاش أعطى النجاة نالناس. وبزاف د الناس الي كانو كيسمعو البشارة د الإنجيل آمنو. ولكن شي ليهود متشددين، تعصبو وبداو كيعارضهم، أما بولس وبرنابا، كانو متشجعين، وكانو كيردو عليهم بالقوة د الروح القدس، وكيفولو لهم: "كان خصنا نوصلولكم أنتم اللولا الكلمة د الله، ولكن رفضتوها وهكذا بينتو بلي ما كتستحقو شي الحياة الأبدية، ها حنا عنهدرو دابا غير مع الناس الي ماشي ليهود"، حيث الله وصانا وقال: "أنا رجعتكم النور د العالم، باش يوصل الخلاص حتى نأخر الأرض".

وملي سمعو الناس الي ماشي ليهود ديك الهدرة فرحو بزاف ومجدو الله وأمنو به وهكذا تعرفت الكلمة د الله في ديك المدينة كاملة.

- الله هو الّلي كيختار الّلي عيعمل الخدمة ديالّه، والروح القدس كيورّي الكنيسة كيفاش تبارك هد الشخص.
- ديمًا العدو د الخير كيشوف شي طريقة باش يوقّف الخدمة د الله، ولكن الله بوحده الّلي عنده السلطة باش يبعده.
- وحي ميّز الله ليهود، وأختارهم، ولكن القصد ديالّه هو غير يستعملهم باش يآمنو الناس كيفما كانوا وينجاو .

## 88: السفر د بولس مع سيلا

أعمال الرسل 16

من بعد ما سافرو بولس وبرنابا وبشرو في بزّاف د المواضع، رجعو نالكنيسة د أنطاكية. وعاودو نالتلاميذ آخرين والخوت الّي في الكنيسة، كيفاش أستعملهم الله في السفر ديالهم، وعلى المعجزات الّي وقولهم. وقالو لهم كيفاش أمنو الناس الّي ماشي ليهود بالرّب يسوع، وكيفاش عرفو بليّ الله بغى الناس كاملين ينجاو .

وهكذا دوزو معهم شي وقت في ديك الكنيسة، ومن بعد سافرو عاود تاني نمدن أخرة. ولكن في ديك السفر الثاني، مشى غير بولسو "سيلا"، ومليّ قطعو واحد المدينة، شاف في الليل بولس واحد الرؤيا. شاف شي راجل من مدينة "مكدونية" طلب منه يدخل نديك المنطقة، باش يعاونهم، ومشاو بولس وسيلا كيفما أمرهم الله وهكذا أمنو في ديك المنطقة بزّاف د الناس، خصوصاً النساء.

في واحد النهار مليّ كانو ماشين يصليو بولس وسيلا، تلاقاو بواحد الخدّامة كتجيب الطرف د الخبز نمواليها غير بتاشوافت حيث كانو ساكنينها الشياطين، ومليّ شافتهم بدات كتجري موراهاهم وكتقول نالناس: "هدو هم عباد الله، هم الّي عيوريو لكم الطريق د الخلاص". وديك الساعة خرّج بولس منها ديك الشياطين الّي كانو فيها. ومليّ ساقو الخبر مواليها تعصبو بزّاف، حيث قطعولهم

الباب د الرزق ديالهم، وشبرو موالين ديك الشوافة بولس وسيلا وأداوهم نالمحكمة، وضربوهم ودخلوهم نالحبس. وحي كان بولس و سيلا في الحبس ما خافو شي و بداو كيغنيو وكيصليو نالله. وعلى غفلة ضرب شي زلزال الحبس، وهكذا تفتحو البيان د الحبس، وحتى السناسل الي كانو مكتفين بهم هم والناس الي معهم في الحبس. ملي شاف العساس د الحبس ديك المعجزة ، فكر بلي الحباسة هربو، وخاف بزاف من القايد ديالته، وبغى يقتل راسه قبل ما يقتلوه الرومان. ولكن بولس غوت عليه وقال : " ما تأدي شي راسك حنا كاملين هنا "، و في ديك الساعة أدخل عندهم العساس وخرّجهم وقال لهم: " شنو خصني نعمل أسيدي باش ننجي؟"، جاوبوه: "أمن بالله يسوع وتنجي أنتين والدار ديالك". وهكذا أداهم معاه نالدار ديالته باش يتعشاو معه. وفي ديك الوقت هدر بولس وسيلا مع العائلة ديالته على يسوع، وآمنو كاملين بالله وتعمّدو في الماء.

وملي صبح الصباح، صيفط شي مسؤول نالعساس واحد الرسالة كيقول له فيها بلي يقدر يخرّجهم وهكذا قدرو يمشيو نعد الخوت الي في ديك المدينة باش يشوفهم ويشجعوهم ومن بعد مشاو في حالهم.

- الله بغانا نكونو واجدين باش نطيعوه كيفما كانت الظروف على حسب الخطة ديالته .

- الله بغي الرسالة د الخلاص توصل نالناس كاملين، ماشي غير ناليهود، وهدى المسؤولية ديالنا.
- ما نخليو شي الظروف الصعبة تأثر علينا، خصنا نفرحو في كل وقت كيفما كيقول الله في الكلمة دياله، حيث هو ديماً معنا وهو الي كيتحكّم في كل شي لينا ناخير.
- وحي تكون عندنا الظروف صعبة خصنا نشوفو الخوت ونشجعوهم بكل الشّي الي أعمل الله في حياتنا، حيث الله ديماً معنا .

## 89: بولس في أثينا وشي مدن آخرين

أعمال الرسل 17

كان بولس والناس الّلي معه كيسافرو بزّاف كيفما أمرهم الله باش يبشرو بالكلمة ديالّه. وكل مدينة كانو كيدخلو لها، كانو كيبشّرو الناس ديالها وكيشرحولهم كيفاش المسيح جاب لهم النجاة. وكانو بزّاف د الناس كيآمنو به، وفي نفس الوقت كانو شي ناس الّلي ما كيآمنو شي به، خصوصاً ليهود.

مدينة "أثينا"، معروفة بالعلماء والفلاسفة ديالها، وهي من بين المواضع الّلي مشاو لهم بولس وسيلّا. والّلي كان بولس كيهدر في كل معبد فيها على الخلاص الّلي جاب المسيح. ولكن شي ناس من ديك الفلاسفة بغاو يعرفو شنو هد التعليم الجديد الّلي جاب بولس، وطلبو منه باش يشرحه لهم. وقف بولس و قال لهم: "أنتم أديك الرجال الأتينيويون! الّلي زعما كتبانو متدينين، مّلي كنت كنتسارى في المدينة ديالكم شفت المعبد ديالكم وجبرت فيه واحد الجملة كتقول: "نلاله المجهول". وهكذا استغل بولس هد الجملة، وبدى كيهدر معهم، وكيقول لهم: "ديك الإله المجهول الّلي أنتم كتعبدوه وما كتعرفوه شي، هو الّلي أنا كنبشركم به، حيث هو الله الّلي خلق كل الشي. وما كيسكون شي في المعابد الّلي اليدين د الناس أبناوها، حيث هو الله د السماء والأرض، وما محتاج شي نالخدمة الّلي كيعلوها الناس، و الله كيغيّط نالناس كاملين باش يتوبو و

ينجاو. وهو ورّى البرهان ديالّه في الموت والقيامة ديالّه  
".

شي ناس من آلي سمعو ديك الهدرة ديالّه بداو كيستهزؤ  
ولكن شي واحدين آخرين آمنو به وبالربّ ديالّه. من بعد  
مشى بولس من مدينة أثينا نكورنثوس ومور ديك الشّي  
مشاو نمدينة أخرة، و بداو فيها واحد الكنيسة. وديك الشّي  
كانو كيعلوه التلاميذ المسيح في أيّ مدينة دخلو لها.

- المسؤولية ديالنا هي نمشيو نأيّ موطن قال لنا الربّ  
عليه، ونوصلو نالناس الكلمة ديالّه باش ينجاو  
وتكون عندهم الحياة الأبدية.
- مزيان نستغلّو أيّ فرصة باش نهذرو مع الناس على  
المحبّة د الله.
- أيّ موطن كنا كنبشرو فيه، نحاولو نبداو شي كنيسة  
تمّا باش الناس المؤمنين يجتمعو فيها ويكبرو في  
الإيمان ديالهم.
- ماعمرنا نفشلو إذا بشرنا شي واحد وما آمنشي،  
حيث المهمة ديالنا هي نزرعو، والله هو آلي كيكبر  
ديك الزراع.

## 90: المَجِّي الثاني د يسوع المسيح

رؤيا يوحنا 1-22

يوحنا كان واحد من التلاميذ د يسوع المسيح الّي كان كيبيغيه بزّاف، قبل ما يموت كان منفي في شي جزيرة مسميّة بطمس بالسبّة د التبشير ديالّه بيسوع. ومليّ كان تمّا ظهر له يسوع في واحد الرؤيا وورّي له شني عيوقع في الأيام الأخيرة في المَجِّي الثاني ديالّه .

كتب يوحنا ديك الشّي الّي شاف كامل نالكنائس السبعة الّي كانو في آسيا، وقال: "السلام من عند الّي كاين والّي كان والّي عيجي، ومن الّي قام من الأموات، ملك الملوك، الّي بغانا حتّى مات من أجلنا وأغسلنا من الخطايا ديالنا بالدمّ ديالّه، ليّله المجد والسلطان نالأبد. هو ماجّي مع السحاب، عتشفو العينين د الناس كاملين، حتّى الناس الّي غدروه، وعتبكي عليه القبائل كاملة".

وزاد يوحنا وقال: "مليّ شافه طاح على الرجلين د يسوع فحال شي الميّت، وحداه بيده د اليمين، وقال له : "ما تخاف شي، أنا هو الأوّل والأخر، أنا الحيّ كنت ميّت وها أنا حيّ نالأبد، وفي يديّ المفاتيح د الموت والهاويّة. كتب الّي شوفتيه والّي وقع دابا والّي علاين يوقع".

وشاف يوحنا: " شاف قدام العرش د الله واحد الحولي مدبوح ومشبّر واحد الكتاب بيده اليمين وسجدله كل الشّي الّي كان تمّا وبداو كيغنيوه شي ترنيمة جديدة، الّي كيقولو له فيها بليّ هو كيستحقّ كل المجد حيت كان

دبيحة آلي خلّصت بالدم ديالها الناس من كل شعب  
والقبيلة واللغة .

وشاف عاود تاني السماء وأرض جديدة حيت السماء  
والارض اللاولى دازو و البحار عمره ماعيكون من بعد،  
وعيمسح الربّ كل دمعة من العينين آلي أمنو به،  
وماعتبقى شي الموت، ولا الحزن ولا الغوات ولا  
الحريق حيت ديك الشّي كامل فات.

وقال له يسوع: أنا الألف و الياء، أنا البداية و النهاية. أنا  
كنعطي نالعطشانين من العين الماء فابور. وآلي غلب  
عيورّت كل الشّي، و عنولّي الله ديالّه و هو عيولّي أبني.  
وفي الآخر قال له: "أنا ماجّي دغياً وعنجازي كل واحد  
على حساب العمل ديالّه، سعدات آلي غسلو الحوايج  
ديالهم، حيت عندهم السلطة على الشجرة د الحياة، والحقّ  
باش يدخلو نالمدينة من الباب. أنا يسوع صيفطت الملاك  
ديالي باش يشهد بهد الشّي، وأنا كنشهد لكم بلي إذا زاد  
أيّ واحد في هد الكتاب شي حاجة، الله عيزيذه المصيبات  
أولا إذا نقّص شي حاجة الله عيحيّده من الشجرة د الحياة.  
والّي كيشهد بهد الشّي كيقول لكم أنا ماجّي قريب" أمين.

- يسوع نجّنا بالموت ديالّه على الصليب، باش نكونو  
معاه ديماً في السماء وباش نمجدو إسمه نالأبد.

- ملّي عنكونو معاه ماعيكون لا الحريق و الحزن ولا  
أي حاجة خايبة حيت هو تغلب على الموت .

- يسوع باقى عيجى ولكن هد المرّة على غفلة، واش عتكون واجد ملى عيجى؟
- يسوع كيقول لك بلى هو واقف قدام الباب ديالك دابا وكيدق، وادا سمعتي الصوت دياله وفتحتي له عيدخل عندك ويتعشى معاك وانتين معاه . (رؤيا (3:20

## الخاتمة

كل واحد فينا في الدّاخل ديالُه كيفتّش على الله وكيّتعدّب  
مّلي كيفكّر في الموت وشنّو كايّن موراها؟ واش دبالصّح  
نقدرو نرضيو الله بالأعمال ديالنا؟ ولكن كل مرّة كنفشلو  
حيث حنا ماشي كاملين وضروري ما نخطاو كيفما وقع  
مع :

أدم مّلي عصى الله و مّلي صقصاه ماعترفشي وجاوب  
الله وقال له : " المرأة الّي أعطيتيني هي الّي زيّغتني ".  
خوئّه د يوسف الّي من الغيرة ديالهم حاولو يقتلوه في  
الأخر سمح لهم.

الشعب د بني إسرائيل الّي خرّجهم الله من العبوديّة د  
فرعون من مصر بأكثر من معجزة ومشاو كيعبدو العجل  
د الذهب.

داوود الّي كان غير سارح ومّلي رجّعهُ الله ملك مشى  
زنى مع المرأة د الراجل أخور.

يسوع الّي عدّبوه ليهود وخّى ما أعمل حتّى حاجة وشنّي  
قال لهم: " ياربّي سمح لهم حيث ماعرفين شي شني  
كيعملو " .

وفي هد القصص كاملين الله غفر نالخطاة وأعطى لهم  
أكثر من فرصة، حيث المحبة ديالُه بلا حدّ وحتى أنتين  
باقي عندك الفرصة باش تعيش نديماً .

# الفهرس

1.....	المقّمة	
2.....	كيفاش خلق الله الدنيا	:1
3.....	آدم و حوّاء في الجنّة	:2
6.....	قايين و هابيل	:3
8.....	نوح	:4
11.....	برج بابل	:5
13.....	مّلي عيط الله نأبرام	:6
15.....	أبرام في مصر	:7
17.....	الفراق ديال أبرام مع لوط	:8
19.....	العهد د الله مع أبرام	:9
21.....	الفكرة د ساراي	:10
23.....	الله كياكّد العهد ديالّه مع أبرام	:11
25.....	الضياف الثلاثة	:12
27.....	إبراهيم كيتشّقع من أجل مدينة سدوم؟	:13
29.....	التطليّة د الملائكة على سدوم	:14
31.....	مّلي قضى الله على سدوم	:15
33.....	الخُلق د إسحاق	:16
34.....	إمتحان آلي عمل الله نابراهيم	:17
36.....	المرأة آلي أختار الله نإسحاق	:18
38.....	يعقوب و عيسو	:19
40.....	الحيلة د رفقة و يعقوب	:20
42.....	الحيلة د لابان مع يعقوب	:21
44.....	يعقوب كيوّلي عنده اسم جديد	:22
46.....	الحيلة آلي تعاملات نيوسف	:23
48.....	يوسف والباطل آلي طاح عليه	:24
50.....	التفسير د الحلمات في الحبس	:25
52.....	العائلة د إسرائيل كترحلّ نمصر	:26
54.....	بني إسرائيل عبيد في مصر	:27
55.....	الخُلق د موسى	:28
57.....	الهروب د موسى من مصر	:29
59.....	الشجرة آلي فيها العافية وما كتحرقشي	:30
61.....	العقاب د الله نفرعون	:31

63.....	الخروج د بني إسرائيل من مصر.....	:32
64.....	الله كي لثوّد بني إسرائيل في الصحراء.....	:33
65.....	النجاة د بني إسرائيل من البحر و فرعون.....	:34
66.....	مَلّي غلب الله العدو.....	:35
68.....	الأمانة د الله مع الشعب ديهاله في الصحراء.....	:36
69.....	شئو وقع في جبل سيناء؟.....	:37
71.....	الوصيات العشرة دالله نالشعب ديهاله.....	:38
73.....	الشعب الخاين.....	:39
74.....	التواجد نالدخول نأرض الموعد.....	:40
76.....	التقة الناقصة في الله.....	:41
78.....	الحية د النحاس.....	:42
80.....	الحضور د الله في وسط الشعب.....	:43
82.....	المعاونة درحاب نبنبي إسرائيل.....	:44
84.....	المعجزة ألي عمل الله في الواد د الأردن.....	:45
86.....	الإستعمار دمدينة أريحا.....	:46
88.....	الرحمة د الله الكبيرة حتى مع الشعب ألي رأسه قاصح.....	:47
90.....	جدعون، قوة د الله في وسط الضعف!.....	:48
92.....	راعوث وئعمي - مَلّي كييدّل الله الحزن بالفرحة.....	:49
95.....	حنة.....	:50
97.....	الملك اللؤلؤ د الشعب بني إسرائيل.....	:51
99.....	العصيان د شاول نالله.....	:52
101.....	العقاب د الله نجوليات و الفلستينيين.....	:53
104.....	الملك داوود.....	:54
106.....	النقطة د الضعف د الملك داوود.....	:55
109.....	ألي أعمل الدنب، كيستاهل العقوبة!.....	:56
111.....	الملك سليمان الحكيم.....	:57
113.....	الفرصة ألي أعطى الله نالشعب ديهاله باش يتوب.....	:58
115.....	المرأة الهجالة.....	:59
117.....	إيليا و الوقت الصعيب ألي دوز.....	:60
119.....	النبي أليشع كيشافي نعمان من البرص.....	:61
121.....	الملاكية د النبي إشعيا مع الله.....	:62
123.....	الله كيهدر مع إشعيا على المَجّي د المسيح.....	:63
125.....	القصة د أيوب.....	:64

127.....	الملك د بابل والصنام ديأله	:65
129.....	دانيال	:66
131.....	الملكة أستير	:67
133.....	الولادة د سيدنا يسوع المسيح	:68
135.....	الهدف من الولادة د يوحنا المعمدان	:69
138.....	الخطبة ديسوع فوق الجبل	:70
141.....	سيدنا المسيح كيهتنّ الريح في وسط البحار	:71
143.....	يسوع المسيح كيشافي واحد الرجل مشلول	:72
145.....	المسيح كيشافي واحد الرجل أعمى	:73
147.....	المسيح كيشافي واحد الولد مسكون	:74
149.....	المسيح كيوكّل أكثر من خمسة آلاف د الناس	:75
151.....	المسيح كيثمشى فوق الماء	:76
153.....	المسيح كيجي ألعازر من الموت	:77
155.....	ملى شبرو ليهود سيدنا المسيح وحكمو عليه	:78
157.....	الموت د يسوع المسيح فوق الصليب	:79
159.....	القيامة د سيدنا يسوع المسيح	:80
161.....	المسيح كيبان نالتلاميد ديأله	:81
164.....	المجيّ د الروح القدس	:82
167.....	الموت د إستيفانوس	:83
169.....	من العدو د المسحيين نمبشّر د المسيح	:84
172.....	بُطرس كيبشّر بالمسيح	:85
175.....	بُطرس كيدخل نالحبس	:86
177.....	الكنيسة كتصيفط برنابا وشاول باش بيشرو	:87
180.....	السفر د بولس مع سيلا	:88
183.....	بولس في أثينا وشي مدن آخرين	:89
185.....	المجيّ الثاني د يسوع المسيح	:90
188.....	الخاتمة	